



Ny Fiainana Mahagagan'i Jesosy Kristy

Omena maimaim-poana,
tsy azo amidy

NY FIAINANA MAHAGAGAN'I JESOSY KRISTY

Jesovy dia tsy mitovy amin'ny olona izay velona ka maty avieo, fa maty Izy ary nitsangana taona maro lasa izay. Araka ny Soratra Masina dia Andriamanitra Mpamorona Izy, izay niaina tety an-tany toy ny olombelona mba ahafahany manome ny rany izay misy fiainana hanavotana izao tontolo izao feno ota avy amin'ny herin'ny fahotana sy Satana ary ny fahafatesana. Velona Izy amin'izao fotoana izao ary manome fiainana mandrakizay ho an'ireo rehetra manatona Azy.

Fandraisana sa fandavana an'i Jesovy Kristy no olan'ny fiainana na fahafatesana. **“Izay manana ny Zanaka no manana ny fiainana; izay tsy manana ny Zanak'-Andriamanitra no tsy manana ny fiainana.”** (1 Jaona 5:12). **“Ary tsy misy famonjena amin'ny hafa; fa tsy misy anarana hafa ambanin'ny lanitra nomena ny olona izay hahazoantsika famonjena”** (Asan'ny Apostoly 4:12).

Ho hitanao anie fa tena misy Andriamanitra eo am-pan-dinihinao ny fiainana mahagagan'i Jesovy Kristy! **“Ary izao no fiainana mandrakizay, dia ny mahafantatra Anao, Izay Andriamanitra tokana sady marina sy Jesovy Kristy Izay efa nirahinao”** (Jaona 17:3). Efa nandray an'i Jesovy tao am-ponao ho Mpamonjy anao sy Tomponao manokana ve ianao? Raha mbola tsy nanao dia ataovy dieny izao.

Ny Soratra Masina ampiasaina dia nalaina avy amin'ny Testamenta Taloha sy ny Testamenta Vaovao—La Sainte Bible Malgache. Sary eo amin'ny fonony nataon'i Edwin B. Wallace.

EFA NISY JESOSY TALOHAN'NY 1 NAHATERAHANY

Tamin'ny voalohany ny Teny, ary ny Teny tao amin'Andriamanitra, ary ny Teny dia Andriamanitra. Izy dia tao amin'Andriamanitra tamin'ny voalohany. Izy no nahariana ny zavatra rehetra; ary raha tsy Izy dia tsy nisy nahariana izao zavatra ary izao, na dia iray aza. Ary ny Teny dia tonga nofo ka nonina tamintsika; ary hitanay ny voninahiny.

—Jaona 1:1-3, 14a

Fa tao aminy no nahariana ny zavatra rehetra... Izy no nahariana ny zavatra rehetra, sady ho Azy izany; ary Izy no talohan'ny zavatra rehetra,....

—Kolosiana 1:16-17

Hoy Jesosy taminy: “Lazaiko aminareo marina tokoa: Fony tsy mbola ary Abrahama, dia Izy Aho.”

—Jaona 8:58

Fa ny Zanaka kosa dia nilazany hoe: “Ny seza fiandriananao, Andriamanitra ô, dia mandrakizay doria.” Ary izao koa: “Hianao, Jehovah ô, tany aloha no nanorenanao ny tany, Ary asan'ny tãnanao ny lanitra.”

—Hebreo 1:8a, 10

Rehefa nampitenenin'Andriamanitra tamin'ny razana fahiny ny mpaminany tamin'ny andro samy hafa sy ny fanao samy hafa; dia amin'izao andro farany izao kosa no nampitenenany tamintsika ny Zanany, Izay voatendriny ho Mpandova ny zavatra rehetra; Izy no nahariany izao tontolo izao.

—Hebreo 1:1-2

2 EFA NILAZA MIALOHA NY FIAINAN'I JESOSY IREO MPAMINANY

“Fa hianao, ry Betlehema Efrata, Izay kely tsy tokony ho isan’ny arivon’i Joda akory, Dia avy ao aminao no hivoahan’Izay anankiray ho Mpanapaka ho Ahy ao amin’ny Isiraely; Hatry ny fahagola no efa nivoahany, dia hatrizay hatrizay.”
–Mika 5:1

Fa Zaza no teraka ho antsika, Zazalahy no omena antsika; Ary ny fanapahana dia eo antsony, Ary ny anarany atao hoe Mahagaga, Mpanolo-tsaina, Andriamanitra Mahery, Rain’ny mandrakizay, Andrian’ny fiadanana. Ny handrosoan’ny fanapahana sy ny fiadanana dia tsy hanam-pahataperana. –Isaia 9:5-6a

Natao tsinontsinona sy nolavin’ny olona Izy; Lehilahy ory sady zatra ny fahoriana,.... Nitondra ny aretintsika tokoa Izy sady nive-satra ny fahoriant­sika; Kanjo isika kosa nanao Azy ho nokapohina sy nasian’Andriamanitra ary nampahoriana. Nefa Izy dia voalefona noho ny fahadisoantsika sy notorotoina noho ny helotsika –Isaia 53:3a, 4-5a

“Ary noho izany dia ny Tompo no hanome famantarana ho anareo: Indro, hanan-anaka ny virijina ka hiteraka zazalahy; Ary ny anarany hataony hoe Imanoela.”
–Isaia 7:14

NANDAO NY LANITRA JESOSY MBA 3 HO TONGA OLONA

Kristy Jesosy koa, Izay, na dia nanana ny endrik'Andriamanitra aza, dia tsy nataony ho zavatra hofikiriny mafy ny fitoviana amin'Andriamanitra, fa nofoanany ny tenany tamin'ny nakany ny endriky ny mpanompo sy ny nahatongavany ho manam-pitoviana amin'ny olona; ary rehefa hita fa nanan-tarehy ho olona Izy, dia nanetry tena ka nanaiky hatramin'ny fahafatesana, dia ilay fahafatesana tamin'ny hazo fijaliana. –Filipiana 2:5b-8

Ny olona voalohany [Adama] avy amin'ny tany, dia tany; ny olona faharoa [Jesosy] dia avy any an-danitra. –1 Korintiana 15:47

Dia nanao hoe: “Ny fanatitra alatsa-dra sy ny fanatitra hohanina tsy mba nilainao, fa tena no namboarinao ho Ahy.” –Hebreo 10:5b

Hoy Jesosy taminy: “...satria avy tamin'Andriamanitra no nivoahako sy nankanesako aty....” –Jaona 8:42

Koa satria manana nofo aman-dra ny zaza, dia mba nandray izany koa Izy, mba handringanany amin'ny fahafatesana ilay manana ny herin'ny fahafatesana, dia ny devoly, ary mba hanafahany izay rehetra nandany ny fiainany rehetra tamin'ny fahandevozana noho ny tahotra ny fahafatesana. –Hebreo 2:14-15

4 NY ANTONY NAHATONGAVAN'I JESOSY TETY AN TANY

“Fa ny Zanak’olona tsy tonga mba hotompoina, fa mba hanompo ka hanolotra ny ainy ho avotra hisolo ny maro.” –Marka 10:45

“Fa efa tonga ny Zanak’olona hitady sy hamonjy ny very.” –Lioka 19:10

Fa rehefa tonga ny fotoan’andro, dia nira-hin’Andriamanitra ny Zanany, nateraky ny vehivavy, nateraka tao ambanin’ny lalàna, hanavotany izay ambany lalàna, mba handraisantsika ny fananganan-anaka.

–Galatiana 4:4-5

“Fa Andriamanitra tsy naniraka ny Zanaka ho amin’izao tontolo izao hanameloka izao tontolo izao, fa mba hamonjeny izao tontolo izao.”

–Jaona 3:17

Jesosy namaly hoe: “...Izao no nahaterahako, ary izao no nihaviako amin’izao tontolo izao, dia ny hanambara ny marina. Izay rehetra avy amin’ny marina dia mihaino ny feoko.”

–Jaona 18:37b

Tonga tetỳ ambonin’ny tany Kristy Jesosy hamonjy ny mpanota

–1 Timoty 1:15b

Andriamanitra naniraka ny Zanani-lahy Tokana tamin’izao tontolo izao, mba hahavelona antsika amin’ny alalany.

–1 Jaona 4:9b

TAMIN'NY FOMBA MAHAGAGA TSY 5 TAKATRY NY SAINA NO NOTOROTORONINA JESOSY

Ary tamin'ny fahenim-bolana dia nirahin' Andriamanitra ny anjely Gabriela ho any antanàna anankiray any Galilia atao hoe Nazareta, ho any amin'ny virijina anan-kiray, izay voafofo ho vadin'ny lehilahy atao hoe Josefa, avy tamin'ny taranak'i Davida; ary ny anaran'ny virijina dia Maria.... Ary hoy ilay anjely taminy: “Aza matahotra, ry Maria, fa efa nahita fitia tamin'Andriamanitra hianao. Ary, indro, hitoe-jaza hianao ka hiteraka zazalahy, ary ny anarany dia hataonao hoe Jesosy. Izy ho lehibe ka hatao hoe Zanakany ny Avo Indrindra;...ary ny fanjakany tsy hanam-pahataperana.” Ary hoy Maria tamin' ilay anjely: “Hanao ahoana re no hahatanteraka izany, fa tsy mahalala lahy aho?” Ary ilay anjely namaly ka nanao taminy hoe: “Ny Fanahy Masina ho tonga ao aminao, ary hisy herin'ny Avo Indrindra hanaloka anao; koa ny Masina Izay hateraka dia hatao hoe Zanak'Andriamanitra. ...Fa tsy hisy tsy ho tanteraka ny teny rehetra ataon'Andriamanitra.”

-Lioka 1:26-27, 30-37

“Ry Josefa, zanak'i Davida, aza matahotra hampakatra an'i Maria vadinao; fa ny Zaza ao an-kibony dia avy amin'ny Fanahy Masina, ka hiteraka Zazalahy izy, ary ny anarany hataonao hoe: Jesosy; fa Izy no hamonjy ny olony ho afaka amin'ny fahotany.”

-Matio 1:20b-21

6 NY NAHATERAHAN' I JESOSY

...nisy didy navoak' i Aogosto Kaisara hampanoratra ny anaran'ny vahoaka rehetra amin'ny fanjakany. ...Ary Josefa koa niakatra [Betlehema]...mba hosoratana izy sy Maria fofom-badiny, izay efa bevohoka. ...Ary niteraka ny Lahimatoany izy, dia nohoddininy lamban-jaza ka nampandriny teo amin'ny fihinanam-bilona; fa tsy nisy nitoerany tao an-tranom-bahiny.

Ary nisy mpiandry ondry tamin'izany tany izany nitoetra tany an-tsaha nitandrina ny ondriany tamin'ny alina. Ary nisy anjelin'ny Tompo nitsangana teo anilany, ary ny voninahitry ny Tompo nanelatrelatra manodidina azy, ka raiki-tahotra indrindra izy. Ary hoy ny anjely taminy: "Aza matahotra; fa indro milaza teny soa mahafaly aminareo aho, dia fifaliana lehibe izay ho an'ny olona rehetra; Mpamonjy no teraka ho anareo anio ao antanànan'i Davida, dia Kristy Tompo...hahita Zazakely voahodidina lamban-jaza sady mandry ao am-pihinanam-bilona." Ary nisy anjely maro be avy any an-danitra niseho tampoka niaraka tamin'ilay anjely teo ka nidera an'Andriamanitra nanao hoe: "Voninahitra any amin'ny avo indrindra ho an'Andriamanitra! Ary fiadanana ho etỳ ambonin'ny tany amin'ny olona ankasitrahany."

-Lioka 2:1-14

Ary rehefa tapitra ny havalohana, ka ho-forana ny Zaza, dia nataony hoe Jesosy ny anarany, araka ilay nataon'ny anjely, fony tsy mbola torontoronina tao an-kibo Izy.

—Lioka 2:21

Ary, indro, nisy lehilahy atao hoe Simeona tao Jerosalema; ary marina sady mpivavaka tsara izany lehilahy izany ka niandry ny fam-piononana ny Isiraely; ary ny Fanahy Masina dia tao aminy. Ary efa nambaran'ny Fanahy Masina taminy fa tsy hahita fahafatesana izy mandra-pahitany ny Kristin'ny Tompo. Ary nentin'ny Fanahy Masina niditra teo ankian-jan'ny tempoly izy; ary rehefa nampidirin'ny ray aman-dreniny Jesosy zaza mba hanao-vany araka ny fomban'ny lalàna ny amin'ny zaza, dia nitro Azy izy ka nidera an'Andria-manitra nanao hoe: “Tompo ô, ankehitriny ny mpanomponao dia alefanao amin'ny fiadanana Araka ny teninao; Fa ny masoko efa nahita ny famonjena. Izay namboarinao teo anatrehan'ny firenena rehetra, dia fahazavana hahazava ny firenena Sady voninahitry ny Isiraely olonao.” Dia gaga ny ray aman-dreniny noho ny teny nilazana Azy. Ary Simeona nitso-drano azy ireo....

—Lioka 2:25-34

Ary rehefa teraka Jesosy tao Betlehema an'i Jodia, tamin'ny andron'i Heroda mpanjaka, indreo, nisy Magy avy tany atsinanana tonga tany Jerosalema ka nanao hoe: "Aiza Ilay teraka ho mpanjakan'ny Jiosy? fa nahita ny kintany teny atsinanana izahay ka tonga mba hiankohoka eo anatrehany."

Ary nony nandre izany Heroda mpanjaka, dia nangorohoro izy mbamin'i Jerosalema rehetra. Dia namory ny lohan'ny mpisorona rehetra sy ny mpanora-dalàna tamin'ny vahoaka izy ka nanontany azy hoe: Aiza moa no hahaterahan'i Kristy? Ary hoy ireo taminy: "Ao Betlehema an'i Jodia; fa izao no voasoratra ny mpaminany."

Ary rehefa nandre ny tenin'ny mpanjaka izy ireo, dia lasa; ary, indro, ilay kintana hitany teny atsinanana nialoha azy mandra-pijano-nany teo ambonin'izay nitoeran'ny Zazakely. Ary nony nahita ny kintana izy, dia nifaly indrindra.

Ary rehefa tafiditra tao an-trano izy, dia nahita ny Zazakely sy Maria reniny ka niankohoka teo anatrehany; ary nony efa nosokafany ny fitehirizan-drakiny dia nanolotra zavatra ho Azy izy, dia volamena sy zavamanitra ary miora.

-Matio 2:1-5, 9-11

TALOHAN'NY NAHATERAHANY JESOSY DIA EFA NANKAHALA AZY SATANA

9

Ary nisy famantarana hafa koa hita tany andanitra, ka indro, nisy dragona [Satana] mena lehibe manan-doha fito sy tandroka folo, ary misy diadema [Satana] fito amin'ny lohany. Ary ny rambony dia manala ny ampahatelon'ny kintana amin'ny lanitra ka manjera ireny ho amin'ny tany; ary ny dragona nijanona teo anatrehan'ilay vehivavy efa hiteraka mba handrapaka ny zanany, raha vao teraka; ary niteraka zazalahy izy, izay efa hanapaka ny firenena rehetra amin'ny tehim-by.

-Apokalypsy 12:3-5a

Nisy anjelin'ny Tompo niseho tamin'i Josefa tamin'ny nofy ka nanao hoe: "Mifohaza hianao, ka ento ny Zazakely sy ny reniny, dia mandosira any Egipta, ary mitoera any ambara-pilazako aminao; fa Heroda efa hitady ny Zazakely hovonoiny." Dia nifoha izy ka nitondra ny Zazakely sy ny reniny, raha mbola alina, dia lasa nankany Egipta; ary nitoetra tany izy ambara-pahafatin'i Heroda. Ary nony efa fantatr'i Heroda fa voafitaky ny Magy izy, dia tezitra indrindra izy ka naniraka namono ny zazalahy rehetra hatramin'ny roa taona no ho midina, izay tao Betlehema sy tamin'ny manodidina rehetra. -Matio 2:13b-15a, 16a

10 NY FAHATOVOLAHY AN'I JESOSY

Ary ny Zaza dia nitombo ka nihahery sady feno fahendrena; ary ny fahasoavan'Andriamanitra no tao aminy. Ary ny ray amandreniny nankany Jerosalema isan-taona, raha avy ny andro firavoravoana amin'ny Paska. Ary rehefa roa ambin'ny folo taona Jesosy, dia niakatra izy ireo, araka ny fanao amin'ny andro firavoravoana. ... Jesosy zaza dia mbola nitoetra tany Jerosalema ihany. ...ary satria nataony fa niaraka tamin'ny niara-dia taminy Izy, dia nandeha lâlana indray andro izy vao nitady Azy tamin'ny havany sy ny olom-patany. Ary nony tsy nahita Azy izy, dia niverina ho any Jerosalema nitady Azy. ...dia hitany teo ankianjan'ny tempoly Izy nipetraka teo afovoan'ny mpampianatra ka nihaino sady nantontany azy. Ary talanjona izay rehetra nandre Azy noho ny fahalalany sy ny famaliany. Ary raha nahita Azy izy, dia talanjona, ka hoy ny reniny taminy: "Anaka, nahoana no nanao toy izany taminay Hianao? He! izato alahelon-drainao sy izaho nitady Anao!" Fa hoy Izy taminy: "Nahoana no nitady Ahy hianareo? tsy fantatrareo va fa tsy maintsy ho eto an-tranon'ny Raiko Aho?"

Ary Jesosy nitombo saina sy tena sady nandroso fitia tamin'Andriamanitra sy ny olona.

-Lioka 2:40-49, 52

NATOLOTRA NY VAHOAKA JESOSY 11

Nisy lehilahy nirahin'Andriamanitra, Jaona no anarany. Dia hoy izy: "Izaho dia feon'ny miantso mafy any an-efitra hoe: Ataovy mahitsy ny làlan'i Jehovah, araka izay nolazain'Isaia mpaminany."

Nony ampitso dia nahita an'i Jesosy avy manatona azy Jaona, ka dia hoy izy: "Indro ny Zanak'ondrin'Andriamanitra, Izay manaisotra ny fahotan'izao tontolo izao!" Izy Ilay nola-zaiko hoe: Misy Lehilahy avy ao aoriako Izay efa tonga eo alohako, satria talohako Izy. Ary izaho tsy nahalala Azy; fa mba haseho amin'ny Isiraely Izy, izany no nihaviako manao batisa amin'ny rano. Ary Jaona nanambara ka nanao hoe: "Izaho nahita ny Fanahy midina avy any an-danitra tahaka ny voromailala ka nitoetra teo amboniny. Ary izaho tsy nahalala Azy; fa Izay naniraka ahy hanao batisa amin'ny rano no nilaza tamiko hoe: 'Izay ho hitanao idinan'ny Fanahy sy itoerany, dia Izy no Mpanao batisa amin'ny Fanahy Masina.' Ary nahita aho, ka dia nanambara fa Izy no Zanak'Andriamanitra."

-Jaona 1:6, 23, 29-34

Ary raha vao natao batisa Jesosy, dia niakatra avy teo amin'ny rano niaraka tamin'izay Izy; ary, indro, nisokatra taminy ny lanitra, ary hitany ny Fanahin'Andriamanitra nidina tahaka ny voromailala ka nankeo amboniny. Ary, injao! Nisy feo avy tany an-danitra nanao hoe: "Ity no Zankako malalako Izay sitrako."

-Matio 3:16-17

MANDRESY NY FAKAM-PANAHY JESOSY

Dia nanatona ny mpaka-fanahy ka nanao taminy hoe: “Raha Zanak’Andriamanitra Hianao, dia teneno ho tonga mofo ireto vato ireto.” Fa Izy kosa namaly ka nanao hoe: Voasoratra hoe: “Tsy mofo ihany no hiveloman’ny olona, fa ny teny rehetra izay aloaky ny vavan’Andriamanitra.”

Ary ny devoly nitondra Azy nankany amin’ny tanàna masina ka nampitoetra Azy teo an-tampon’ny tempoly, dia nanao taminy hoe: “Raha Zanak’Andriamanitra Hianao, mianjerà any ambany any; fa voasoratra hoe: ‘Izy handidy ny anjeliny ny aminao; Ary eny an-tànany no hitondran’ireo Anao, Fandrao ho tafintohina amin’ny vato ny tongotrao.’ ”

Hoy Jesosy taminy: “Voasoratra hoe koa: ‘Aza maka fanahy an’i Jehovah Andriamanitrao.’” Ary ny devoly nitondra Azy indray nankany an-tendrombohitra avo dia avo ka naneho Azy ny fanjakana rehetra amin’izao tontolo izao mbamin’ny voninahiny, dia nanao taminy hoe: “Izao rehetra izao dia homeko Anao, raha hiankohoka eto anatrehako Hianao.” Fa hoy Jesosy taminy: “Mandehana hianao, ry Satana: fa voasoratra hoe; ‘Jehovah Andriamanitrao no hiankohofanao, ary Izy irery ihany no hotompoinao.’ ” –Matio 4:3-10

Fa satria nalaim-panahy ny tenany tamin’ny fahoriana nentiny, dia mahavonjy izay alaim-panahy koa Izy. –Hebreo 2:18

Ary nony nandalo teny amoron'ny Ranomasin'i Galilia Izy, dia nahita an'i Simona sy Andrea, rahalahin'i Simona, nanarato teo amoron'ny ranomasina; fa mpanarato izy. Ary hoy Jesosy taminy: "Andeha hanaraka Ahy, fa hataoko mpanarato olona hianareo." Dia nandao ny haratony niaraka tamin'izay izy ka nanaraka Azy. Ary rehefa nandroso kelikely Izy, dia nahita an'i Jakoba, zanak' i Zebedio, sy Jaona rahalahiny, izay teo an-tsambokely koa namboatra ny haratony. Dia niantso azy niaraka tamin'izay Izy; ary izy mirahalaha nandao an'i Zebedio rainy teo an-tsambokely mbamin'ny olona nokaramainy, ka dia nanaraka an'i Jesosy. -Marka 1:16-20

Nony ampitso dia te-hiala ho any Galilia Jesosy, ary nahita an'i Filipo Izy ka nanao taminy hoe: "Manaraha Ahy." -Jaona 1:43

Ary nony nandalo Izy, dia nahita an'i Levy zanak'i Alfeo, nipetraka teo am-pamoriantetra; ka hoy Izy taminy: "Manaraha Ahy." Dia nitsangana izy ka nanaraka Azy. -Marka 2:14

Ary naharitra nivavaka tamin'Andriamanitra nandritra ny alina Izy. Ary nony maraina ny andro, dia nantsoiny hanatona Azy ny mpianany, ka nifidianany roa ambin'ny folo lahy, izay nataony hoe Apostoly. -Lioka 6:12b-13

14 MITORY NY VAOVAO MAHAFALY JESOSY

Ary Jesosy niverina tamin'ny herin'ny Fanahy nankany Galilia; dia niely tamin'ny tany rehetra manodidina ny lazany. Ary Izy nampianatra teny amin'ny synagogan'ny olona ka nankalazain'izy rehetra. Dia tonga tao Nazareta, izay nahabe Azy, Izy; ary araka ny fanaony dia niditra tao amin'ny synagoga tamin' ny andro Sabata Izy ka nitsangana hamaky teny. Dia natolotra Azy ny bokin'Isaia mpaminany; ary nony namelatra ny boky Izy, dia nahita ny teny voasoratra hoe: "Ny Fana-hin'i Jehovah no ato amiko, Satria nanosotra Ahy hitory teny soa mahafaly amin'ny malahelo Izy; Naniraka Ahy hitory fandefasana amin'ny mpifatotra Izy, Sy fampahiratana amin'ny jamba, Hanafaka izay nampahorina, Hitory ny taona ankasitrahan'i Jehovah." Ary rehefa nahorony ny boky ka naveriny tamin'ny mpanao raharaha, dia nipetraka Izy. Ary nandinika Azy ny mason'izay rehetra teo amin'ny synagoga. Ary Jesosy niteny taminy hoe: "Andro-any no efa tanteraka eto anatrehanareo izany soratra izany."

Ary izy rehetra nankalaza Azy sady talanjona noho ny tenin'ny fahasoavana naloaky ny vavany,...

-Lioka 4:14-22a

MANADIO NY TEMPOLY JESOSY 15

Ary tonga tany Jerosalema izy: ary Jesosy niditra teo an-kianjan'ny tempoly, dia nandroaka izay nivarotra sy izay nividy teo an-kianjan'ny tempoly sady nanjera ny latabatra ny mpanakalo vola sy ny fipetrahan'ny mpi-varotra ny voromailala. Dia nampianatra Izy ka nanao taminy hoe: “Tsy voasoratra hoe va: ‘Ny tranoko hatao hoe trano fivavahana ho an’ny firenena rehetra?’ fa hianareo kosa efa nanao azy ho ‘zohy fieren’ny Jiolahy.’ ”

–Marka 11:15, 17

MAMPIANATRA NY AMIN'NY FAHOTANA JESOSY

“Dia tahaka izany koa hianareo: raha amin’ny eo ivelany dia miseho amin’ny olona ho marina, nefa ny ao anatinareo dia feno fihatsarambelatsihy sy tsi-fankatoavan-dalàna.”

–Matio 23:28

“Fa izay mivoaka avy amin’ny vava kosa dia avy amin’ny fo, ka izany no mahaloto ny olona. Fa avy amin’ny fo no ivoahan’ny sain-dratsy, dia ny vonoan-olona, ny fakam-badin’olona, ny fijangajangana, ny halatra, ny ampanga lainga, ny fitenenan-dratsy.”

–Matio 15:18-19

Jesosy namaly azy hoe: “Lazaiko aminareo marina dia marina tokoa fa izay rehetra manota dia andevon’ny ota. Koa raha ny Zanaka no hahafaka anareo, dia ho afaka tokoa hianareo.”

–Jaona 8:34, 36

16 MANOME FIAINAM-BAOVAO JESOSY

Jesosy namaly ka nanao taminy hoe: “Lazaiko aminao marina dia marina tokoa: Raha tsy ateraka indray ny olona, dia tsy mahazo mahita ny fanjakan’Andriamanitra. Aza gaga noho ny nilazako taminao hoe: ‘Tsy maintsy hateraka indray hianareo.’ Fa toy izao no nitiavan’Andriamanitra izao tontolo izao: nomeny ny Zanani-lahy Tokana, mba tsy ho very izay rehetra mino Azy, fa hanana fiainana mandrakizay.” –Jaona 3:3, 7, 16

“Izaho avy mba hananany fiainana, sady hananany be dia be.” –Jaona 10:10b

“Ary izao no fiainana mandrakizay, dia ny mahafantatra Anao, Izay Andriamanitra tokana sady marina, sy Jesosy Kristy, Izay efa nirahinao.” –Jaona 17:3

“Fa toy ny Ray manangana sy mamelona ny maty, dia tahaka izany koa no ameloman’ny Zanaka izay tiany. Lazaiko aminareo marina dia marina tokoa: Izay mandre ny teniko ka mino Izay naniraka Ahy no manana fiainana mandrakizay ka tsy hohelohina; fa tafafindra niala tamin’ny fahafatesana ho amin’ny fiainana izy.” –Jaona 5:21, 24

Koa raha misy olona ao amin’i Kristy, dia olom-baovao izy; efa lasa ny zavatra taloha, indreo, efa tonga vaovao ireo. –2 Korintiana 5:17

Dia tonga tao an-tanàna anankiray any Samaria Izy, izay atao hoe Sykara.... Ary satria sasatra Jesosy tamin'ny nalehany, dia nipetraka teo am-pantsakana Izy,... Ary nisy vehivavy Samaritana anankiray avy hantsaka rano; dia hoy Jesosy taminy: "Omeo Aho hosotroiko." ...Fa hoy ravehivavy Samaritana taminy: "Nahoana Hianao no Jiosy ka mangataka amiko hosotroina, nefa aho vehivavy Samaritana?" ...Jesosy namaly ka nanao taminy hoe: "Raha fantatrao ny fanomezan'Andriamanitra sy Izay miteny aminao hoe: 'Omeo Aho hosotroiko,' dia hianao no ho nangataka taminy, ka nomeny rano velona. Izay rehetra misotro ity rano ity dia mbola hangetaheta indray; fa na iza na iza no misotro ny rano izay homeko azy dia tsy hangetaheta mandrakizay; fa ny rano izay homeko azy dia ho loharano miboiboika ao anatin'ny ho fiainana mandrakizay."

–Jaona 4:5-10, 13-14

Jesosy ka niantso nanao hoe: "Raha misy olona mangetaheta, aoka izy hanatona Ahy ka hisotro." Izay mino Ahy, dia hisy onin'ny rano velona hiboiboika avy ao an-kibony, araka ny voalazan'ny Soratra Masina. Ary ny Fanahy, Izay efa horaisin'ny mino Azy, no nolazainy tamin'izany; fa ny Fanahy tsy mbola nomena,...

–Jaona 7:37b-39a

18 MAMPIANATRA AMIN'NY ALALAN'NY FANO HARANA JESOSY

“Koa amin'izany na zovy na zovy no mandre izany teniko izany ka mankatò azy, dia hoharina amin'ny lehilahy manan-tsaina izy, izay nanorina ny tranony teo ambonin'ny vatolampy. Ary latsaka ny ranonorana, ka nisy riaka be, sady nifofofoko ny rivotra ka namely izany trano izany; nefa tsy nianjera izy, satria efa naorina teo ambonin'ny vatolampy. Fa izay rehetra mandre izany teniko izany, nefa tsy mankatò azy, dia hoharina amin'ny lehilahy adala, izay nanorina ny tranony teo ambonin'ny fasika. Ary latsaka ny ranonorana, ka nisy riaka be, sady nifofofoko ny rivotra ka namely izany trano izany; dia nianjera izy, ka loza ny fianjerany.” –Matio 7:24-27

“Iza moa no olona aminareo, izay manana ondry zato, ka very ny anankiray, no tsy mandao ny sivy amby sivi-folo any an-efitra ka mandeha hitady ilay very mandra-pahitany azy? ary rehefa hitany iny, dia ataony eo antsorony, ka dia faly izy; ary rehefa tonga ao an-trano izy, dia mamory ny sakaizany sy ny namany ka manao aminy hoe: ‘Avia hiaramifaly amiko; fa efa hitako ilay ondriko very.’ Lazaiko aminareo fa hisy fifaliana toy izany any an-danitra ny amin'ny mpanota iray izay mibebaka noho ny amin'ny olona marina sivy amby sivi-folo, izay tsy misy tokony hibebahany.”

–Lioka 15:4-7

MAMPIANATRA NY FOMBA AHAZOANA FITAHIANA JESOSY

19

Ary Jesosy, nony nahita ny vahoaka, dia nia-katra teo an-tendrombohitra; ary rehefa tafapetraka Izy, dia nanatona Azy ny mpianany. Dia niloa-bava Izy ka nampianatra azy hoe: “Sambatra ny malahelo am-panahy; fa azy ny fanjakan’ny lanitra. Sambatra ny ory; fa izy no hampifalina. Sambatra ny malemy fanahy; fa izy no handova ny tany. Sambatra ny noana sy mangetaheta ny fahamarinana; fa izy no hovokisana. Sambatra ny miantra; fa izy no hiantrana. Sambatra ny madio am-po; fa izy no hahita an’Andriamanitra. Sambatra ny mpampihavana; fa izy no hatao hoe zanak’Andriamanitra. Sambatra izay enjehina noho ny fahamarinana; fa azy ny fanjakan’ny lanitra. Sambatra hianareo, raha haratsin’ny olona sy enjehiny ary asiany izay teny ratsy rehetra hitenenany lainga anareo noho ny amiko. Mifalia sy miravoravo hianareo, fa lehibe ny valim-pitianareo any an-danitra.”

–Matio 5:1-12a

“Eny tokoa, kanefa mainka sambatra aza ny mihaino ny tenin’Andriamanitra ka mitandrana izany.”

–Lioka 11:28b

“Satria nahita Ahy hianao, dia nino; sambatra kosa izay tsy nahita, nefa nino.”

–Jaona 20:29b

“Ary sambatra izay tsy ho tafintohina noho ny amiko.”

–Lioka 7:23

20 MAMPIANATRA MOMBA NY VAVAKA JESOSY

Fa tsy mety raha tsy mivavaka mandra-
kariva izy ka tsy reraka. –Lioka 18:1b

“Nisy roa lahy niakatra teo an-kianjan’ny
tempoly hivavaka; ny anankiray Fariseo, ary
ny anankiray mpamory hetra. Ilay Fariseo
nitsangana ka nivavaka nitokana hoe:
‘Andriamanitra ô, misaotra Anao aho fa tsy
mba tahaka ny olona sasany, izay mpanao an-
keriny, tsy marina, mpijangajanga, na tahaka
io mpamory hetra io aza.’ Mifady indroa isan-
kerinandro aho; mandoa ny fahafolon-karena
amin’izay azoko rehetra aho. Fa ilay mpamory
hetra kosa nijanona teny lavitra eny, sady tsy
nety niandrandra ny lanitra akory, fa niteha-
tratra ka nanao hoe: ‘Andriamanitra ô, mamin-
drà fo amiko mpanota.’ Lazaiko aminareo: Izany
lehilahy izany nidina tany an-tranony efa no-
hamarinina noho ny anankiray; fa izay rehetra
manandra-tena no haetry, ary izay rehetra
manetry tena no hasandratra.” –Lioka 18:10-14

“Raha misy roa aminareo mifanaiky etỳ am-
bonin’ny tany na amin’inona na amin’inona ka
hangataka izany, dia ho azony avy amin’ny
Raiko Izay any an-danitra izany. Fa na aiza na
aiza no iangonan’ny roa na telo amin’ny ana-
rako, dia ao afovoany Aho.” –Matio 18:19b, 20

“Ary na inona na inona no angatahinareo
amin’ny fivavahana atao amin’ny finoana dia
ho azonareo.” –Matio 21:22

MAMPIANATRA NY FOMBA MAHA-MPIANATRA JESOSY

21

Dia hoy Jesosy tamin'ny mpianany: “Raha misy olona ta-hanaraka Ahy, aoka izy handà ny tenany sy hitondra ny hazo fijaliany ka hanaraka Ahy. Fa na iza na iza no ta-hamonjy ny ainy, dia hahavery azy; ary na iza na iza no hahavery ny ainy noho ny amiko, dia hahazo izany. Fa inona moa no soa ho azon'ny olona, raha mahazo izao tontolo izao, kanefa very ny ainy?”

–Matio 16:24-26a

“Ary toy izany koa hianareo rehetra, izay tsy mahafoy izay rehetra anananareo, dia tsy azo ekena ho mpianatro.”

–Lioka 14:33

“Raha tia Ahy hianareo, dia hitandrina ny didiko.”

–Jaona 14:15

“Izao no didiko, dia ny mba hifankatiavanareo tahaka ny nitiavako anareo.”

–Jaona 15:12

“Izany no hahafantaran'ny olona rehetra fa mpianatro hianareo, raha mifankatia.”

–Jaona 13:35

Dia hoy Jesosy tamin'ny ... “Raha maharitra amin'ny teniko hianareo, dia ho mpianatro tokoa.”

–Jaona 8:31

“Izany no ankalazana ny Raiko, mba hamoazanareo be ka ho tonga mpianatro hianareo.”

–Jaona 15:8

22 MAMPIANATRA MIKASIKA NY LANITRA SY NY HELO JESOSY

“Tsy izay rehetra manao amiko hoe: ‘Tom-poko, Tompoko,’ no hiditra amin’ny fanjakan’ny lanitra, fa izay manao ny sitrapon’ny Raiko Izay any an-danitra.”
–Matio 7:21

“Raha tsy miova hianareo ka ho tonga taha-ka ny zazakely, dia tsy hiditra amin’ny fanjakan’ny lanitra mihitsy hianareo.” –Matio 18:3b

“Midira amin’ny vavahady èty hianareo; fa lehibe ny vavahady, ary malalaka ny làlana izay mankany amin’ny fahaverezana, ka maro ny miditra any. Fa èty ny vavahady, ary tèry ny làlana izay mankany amin’ny fiainana, ka vitsy ny mahita azy.”
–Matio 7:13-14

“Dia tahaka izany no hatao amin’ny fahata-peran’izao tontolo izao; hivoaka ny anjely ka hanavaka ny ratsy fanahy hisaraka amin’ny marina, dia hatsipiny any amin’ny fandroana lehibe mirehitra afo izy; any no hisy ny fito-maniana sy ny fikitroha-nify.” –Matio 13:49-50

“Aza malahelo ny fonareo; minoa an’Andria-manitra, ary minoa Ahy koa. Ao an-tranon’ny Raiko misy fitoerana maro; raha tsy izany, dia efa nilaza taminareo Aho; fa handeha hamboatra fitoerana ho anareo Aho. Ary raha handeha hamboatra fitoerana ho anareo Aho, dia ho avy indray ka handray anareo ho any amiko, ka izay itoerako no hitoeranareo koa.”
–Jaona 14:1-3

MANAMBARA AMINTSIKA JESOSY 23

HOE IZA MOA IZY

“Izaho no mofo velona izay nidina avy tany an-danitra; raha misy mihinana ity mofo ity, dia ho velona mandrakizay izy; ary ny mofo izay homeko dia ny nofoko ho fiainan’izao tontolo izao.”
–Jaona 6:51

“Izaho no vavahady; raha Izaho no hidiran’ny olona, dia hovanjena izy ka hiditra sy hivoaka sady hahazo hanina. Izaho no Mpiandry Tsara: ny Mpiandry Tsara manolotra ny ainy hamonjy ny ondry.”
–Jaona 10:9, 11

“Izaho no lâlana sy fahamarinana ary fiainana; tsy misy olona mankany amin’ny Ray, afa-tsy amin’ny alalako.”
–Jaona 14:6b

“Izaho no fahazavan’izao tontolo izao; izay manaraka Ahy tsy mba handeha amin’ny maizina, fa hanana ny fahazavan’aina.”
–Jaona 8:12b

“Izaho no fananganana ny maty sy fiainana; izay mino Ahy, na dia maty aza, dia ho velona indray.”
–Jaona 11:25b

“Hianareo manao Ahy hoe Mpampianatra sy Tompo; ary marina ny filazanareo, fa izany tokoa Aho.”
–Jaona 13:13

Dia hoy izy rehetra: “Zanak’Andriamanitra va ary Hianao?” Ary hoy Izy taminy: “Voalazanareo fa Izaho no Izy.”
–Lioka 22:70

24 MANANA FAHEFANA AMIN'NY ARETINA JESOSY

Ary, indro, nisy boka anankiray nanatona dia niankohoka teo anatrehany ka nanao hoe: “Tompoko ô, raha mety Hianao, dia mahay manadio Ahy.” Ary Jesosy naninjitra ny tàmàny, dia nanendry azy ka nanao hoe: “Mety Aho; madiova hianao.” Dia nadio tamin’ny habokany niaraka tamin’izay izy. –Matio 8:2-3

Ary, indro, nisy vehivavy izay nanana fanahy mahafarofy valo ambin’ny folo taona, ary nanjoko izy ka tsy nahatraka akory. Ary rehefa nahita azy Jesosy, dia niantso azy ka nanao taminy hoe: “Ravehivavy, afaka amin’ny rofinao hianao.” Dia nametraka ny tàmàny taminy Izy; ary niaraka tamin’izay dia nitraka ravehivavy sady nankalaza an’ Andriamanitra. –Lioka 13:11-13

Ary nisy vahoaka betsaka nankeo aminy nitondra ny mandringa, ny jamba, ny moana, ny kilemaina, ary ny maro hafa koa, ka name-traka azy teo akaikin’ny tongotr’i Jesosy; dia nahasitrana azy Izy. –Matio 15:30

Ary ny rafozambavin’i Simona nandry teo nanavin’ny tazo; ary niaraka tamin’izay dia nilaza azy taminy izy ireo. Dia nanatona Jesosy ka nandray ny tàmàny ary nanarina azy; dia afaka ny tazony, ka dia nanompo azy izy. –Marka 1:30-31

MANANA FAHEFANA AMIN'NY 25 VOAHARY MANONTOLO JESOSY

Dia nasainy nipetraka teny ambonin'ny ahitra ny vahoaka, ary noraisiny ny mofo dimy sy ny hazandrano roa, dia niandrandra ny lanitra Izy ka nisaotra; ary nony efa novakiny ny mofo, dia natolony ny mpianatra, ary ny mpianatra kosa nanolotra ho an'ny vahoaka. Ary nihinana avokoa izy rehetra, ka dia voky; ary nangoniny ny sombintsombiny sisa tsy lany, ka dia nahafeno harona roa ambin'ny folo. Ary izay nihinana dia tokony ho dimy arivo lahy, afa-tsy ny zaza amim-behivavy. –Matio 14:19-21

Ary tamin'ny fiambenana fahefatra amin'ny alina dia nankeny amin'ny mpianany Jesosy, nitsangantsangana teny ambonin'ny ranomasina. Ary nony nahita Azy nitsangantsangana tambonin'ny ranomasina ny mpianatra, dia raiki-tahotra ka nanao hoe: Matoatoa io; “dia niantso izy noho ny tahotra.” Ary Jesosy niteny taminy niaraka tamin'izay hoe: “Matokia, fa Izaho ihany, aza matahotra.” –Matio 14:25-27

Ary nisy tafio-drivotra mahery, ary nianje-razeran'ny alondrano ny sambokely ka nila ho feno rano. ...ary namoha Azy izy ireo ka nanao taminy hoe: “Mpampianatra ô, tsy mpaninona Anao va izao hahafatesanay izao?” Ary nifoha Izy, dia niteny mafy ny rivotra sady nilaza tamin'ny ranomasina hoe: “Mangina, mitsahara.” Ary dia nitsahatra ny rivotra, ka tony tsara ny andro. –Marka 4:37-39

MANANA FAHEFANA HAMELA HELOKA JESOSY

“Fa mba ho fantatrareo fa ny Zanak’olona manana fahefana etỳ ambonin’ny tany hame-la heloka” (dia hoy Izy tamin’ily mararin’ny paralysisa): “Mitsangàna, betao ny fandrianao, ka modia any an-tranonao.” Dia nitsangana izy ka lasa nody tany an-tranony.

–Matio 9:6-7

Dia hoy Izy tamin-dravehivavy: “Voavela ny helokao.” Ary izay niara-nipetraka nihinana teo aminy dia niresaka hoe: “Iza moa Ity no mba mamela heloka?”

–Lioka 7:48-49

“Ary aoka ho fantatrareo, ry rahalahy, fa izany Lehilahy izany no itoriana famelaneloka aminareo; Ary ao aminy no anamarinana izay rehetra mino ho afaka amin’ny heloka rehetra izay tsy azo nanamarinana anareo tamin’ny lalàn’i Mosesy.”

–Asan’ny Apostoly 13:38-39

Izy no ananantsika fanavotana amin’ny rany, dia ny famelana ny fahadisoantsika, araka ny haren’ny fahasoavany.

–Efesiana 1:7

Raha miaiky ny fahotantsika isika, dia mahatoky sy marina Izy ka mamela ny fahotantsika sy manadio antsika ho afaka amin’ny tsi-fahamarinana rehetra.

–1 Jaona 1:9

MANANA FAHEFANA HANDRESY 27 NY DEMONIA JESOSY

Ary nisy olona tao amin'ny synagoga, izay nanana ny fanahin'ny demonia maloto, dia niantso tamin'ny feo mahery izy ka nanao hoe: “Indrisy! Moa mifaninona akory izahay sy Hianao, ry Jesosy avy any Nazareta? Avy handringana anay va Hianao? Fantatro fa Ilay Masin'Andriamanitra Hianao.” Fa Jesosy niteny mafy azy ka nanao hoe: “Mangina hianao, ka mivoaha aminy.” Ary ny demonia, nony namotraka azy teo afovoan'ny olona, dia nivoaka taminy, nefa tsy naharatra azy. Ary talanjona avokoa izy rehetra ka niresaka hoe: “Manao ahoana izao teny izao! Fa amin'ny fahefana sy ny hery no andidiany ny fanahy maloto, dia mivoaka ireo.”

—Lioka 4:33-36

Ary raha mbola nanatona izy, dia nampihin-jitrinjitra sy nampifanintontsitona azy ny demonia. Ary Jesosy niteny mafy ny fanahy maloto ka nahasitrana ny zazalahy; dia natalony tamin-drainy indray izy. Dia talanjona izy rehetra noho ny fiandrianan'Andriamanitra. Fa raha talanjona izy rehetra tamin'izay rehetra nataon'i Jesosy, dia hoy Izy tamin'ny mpianany.

—Lioka 9:42-43

“Nohosoran'Andriamanitra tamin'ny Fanahy Masina sy ny hery sady nandehandeha nanao soa sy nahasitrana izay rehetra azon'ny herin'ny devoly, satria Andriamanitra nomba Azy.”

—Asan'ny Apostoly 10:38b

28 MANANA FAHEFANA AMIN'NY FAHAFATESANA JESOSY

Hoy Jesosy: “Esory ny vato.” Hoy Marta, anabavin’ny maty, taminy: “Tompoko, maimbo izy izao, fa hefarana izay.” Hoy Jesosy: “Tsy voalazako va fa raha hino hianao, dia ho hitanao ny voninahitr’Andriamanitra?” Ary rehefa nanao izany teny izany Izy, dia niantso tamin’ny feo mahery hoe: “Ry Lazarosy, mivoaha!” Dia nivoaka ny maty nisy fehim-paty ny tàmany sy ny tongony.... Hoy Jesosy tamin’ny olona: “Vahao izy, ka avelao handeha.”

—Jaona 11:39-40, 43-44

Dia niankohoka teo anatrehany ka nanao hoe: “Maty ankehitriny izao ny zanako-vavy; fa andeha re, mametraha ny tàmanao aminy, dia ho velona izy.” Ary nony efa navoaka ny olona, dia niditra Jesosy ka nandray ny tàmnan-drazazavavy, dia nitsangana izy.

—Matio 9:18b, 25

Ary rehefa mby teo akaikin’ny vavahadin’ny tanàna Izy, dia, indro, nisy fatin’ny lehilahy anankiray nentina nivoaka, izay zanakalahy tokan’ny reniny.... Ary nony nahita andravehivavy ny Tompo, dia onena azy ka nanao taminy hoe: “Aza mitomany.” Ary nanaona Izy ka nanendry ny tranovorona.... Ary hoy Jesosy: “Ry zatovo, hoy Izaho aminao: Miarena.” Dia niarina ny maty sady niteny....

—Lioka 7:12-15a

IREO VALIN-TENY AMIN'NY ASA 29

FANOMPOANA NATAON'I JESOSY

Dia nanontany ny mpianany Izy ka nanao hoe: “Ataon’ny olona ho iza moa ny Zanak’olona?” Dia hoy ireo: “Hoy ny sasany: Jaona Mpanao-batisa; ary hoy ny sasany: Elia; ary hoy ny sasany: Jeremia, na anankiray amin’ny mpaminany.” Ary hoy Jesosy taminy: “Fa hianareo kosa manao Ahy ho iza?” Ary namaly Simona Petera ka nanao hoe: “Hianao no Kristy, Zanak’Andriamanitra velona.” Dia namaly Jesosy ka nanao taminy hoe: “Sambatra hianao, ry Simona Bar-jona; fa tsy nofo amandra no naneho anao izany, fa ny Raiko Izay any an-danitra.”
-Matio 16:13b-17

Ary maro tamin’ireo no nanao hoe: “Manana demonia Izy ka efa very saina; nahoana no mihaino Azy hianareo?” Hoy kosa ny sasany: “Tsy mba tenin’ny demoniaka izany; moa ny demonia va mahay mampahiratra ny mason’ny jamba?”
-Jaona 10:20-21

Ary maro tamin’i Jiosy, dia ireo nankeo amin’i Maria ka nahita ny zavatra nataon’i Jesosy ireo, no nino Azy. Fa ny sasany tamin’ireo kosa dia lasa nankany amin’ny Fariseo ka nilaza taminy izay nataony. Koa hatramin’izany andro izany dia nihendry hahafaty Azy ireo.
-Jaona 11:45-46, 53

“Halany foana Aho.”

-Jaona 15:25b

30 MANAMBARA MIALOHA NY FAHA- FATESANY SY NY FITSANGANANY AMIN'NY MATY JESOSY

Dia nampianatra azy Izy fa ny Zanak'olona tsy maintsy hijaly mafy ka holavin'ny loholona sy ny lohan'ny mpisorona ary ny mpanora-dalàna, dia hovonoiny, ary rehefa afaka hateloana, dia hitsangana indray Izy.

–Marka 8:31

“Ary Izaho, raha asandratra hiala amin'ny tany, dia hitaona ny olona rehetra hanatona Ahy.” Izany no nolazainy hanambara izay fahafatesana efa hiaretany. –Jaona 12:32-33

Jesosy namaly ka nanao taminy hoe: “Ravao ity tempoly ity, ary amin'ny hateloana dia hatsangako indray izy.” Fa hoy ny Jiosy: “Enina amby efa-polo taona izay no efa nanaovana ity tempoly ity, ka Hianao va hahatsangana azy amin'ny hateloana?” Fa ny tenany no tempoly nolazainy. Ary koa, rehefa nitsangana tamin'ny maty Izy, dia tsaroan'ny mpianany fa efa nilaza izany Izy.

–Jaona 2:19-22a

“Fa tahaka ny nitoeran'i Jona hateloan'andro sy hateloan'alina tao an-kibon'ny hazandrano lehibe, dia toy izany no hitoeran'ny Zanak'olona hateloan'andro sy hateloan'alina ao anatin'ny tany.”

–Matio 12:40

“Fa rehefa atsangana Aho, dia hialoha anareo ho any Galilia.”

–Matio 26:32

JESOSY MBA HO FATY

Ary nony ampitson'iny ny vahoaka betsaka, izay tonga ho amin'ny andro firavoravoana, rehefa nahare fa hankany Jerosalema Jesosy, dia naka sampan-drofia ka nivoaka hitsena Azy sady niantso hoe: "Hosana! 'Isaorana anie ny Mpanjakan'ny Isiraely,' Ilay avy amin'ny anaran'i Jehovah." Ary Jesosy nahita zanaboriky anankiray, dia nitaingina azy, araka ny voasoratra hoe: "Aza matahotra, ry Ziona zanakavavy; indro, avy ny Mpanjankanao mitaingina zanaboriky."
-Jaona 12:12-15

Na dia noraisin'ny maro tamin-kafanam-po aza Izy raha niditra tao Jerosalema dia efa fantatr'i Jesosy fa handà ny maha-Mpanjaka Azy ireo olony ireo. Nitomany Izy teo ampieritreretana ny hanjo an'i Jerosalema satria tsy nety nandray Ilay hany Tokana izay afaka mitondra fiadanana ho azy ireo izy.

Ary raha nanakaiky Izy ka nahita ny tanàna, dia nitomany azy ka nanao hoe: "Raha mba nahafantatra mantsy hianao na dia amin'ity andro ity aza izay momba ny fiadanana! - fa ankehitriny miafina amin'ny masonao izany. Fa ho avy aminao ny andro izay hananganan'ny fahavalonao tovon-tany manodidina anao...ka tsy havelany hisy vato mifanongoa eo aminao, ho valin'ny tsy nahafantaranao ny andro namangiana anao."

-Lioka 19:41-44

JESOSY, ILAY ZANAK'ONDRIN'NY PASKA

Nahita an'i Jesosy avy manatona azy Jaona, ka dia hoy izy: "Indro ny Zanak'ondrin'Andriamanitra, Izay manaisotra ny fahotan'izao tontolo izao!"
 -Jaona 1:29b

Ary tonga ny andro fihinanana ny mofo tsy misy masirasira, dia ilay tsy maintsy hamonana ny Paska [zanak'ondry]. Ary Jesosy naniraka an'i Petera sy Jaona ka nanao hoe: "Mandehana, ka amboary ny Paska hohanintsika." Ary nandray mofo Izy, ary rehefa nisaotra, dia novakiny ka natolony azy sady nataony hoe: "Ity no tenako izay omena ho anareo; izao no ataovinareo ho fahatsiarovana Ahy." Dia nandray kapoaka Izy, ka nony efa nisaotra, dia natolony azy; ka dia nisotroan'izy rehetra izany. Ary hoy Izy taminy: "Ity no rako amin'ny fanekena, izay alatsaka hamonjy ny maro."

-Lioka 22:7-8, 19; Marka 14:23-24

Nampahorina Izy, Nefa nanetry tena ka tsy niloa-bava, Dia tahaka ny zanak'ondry entina hovonoina.
 -Isaia 53:7a

Fa voavono Kristy, Paska ho antsika.

-1 Korintiana 5:7b

Fa fantatrareo fa tsy zavatra mety ho simba, tahaka ny volafotsy, ... fa ny ra soan'i Kristy, toy ny ran'ny zanak'ondry tsy misy kilema ary tsy misy pentimpentina. -1 Petera 1:18-19

VOAFITAKA SY VOASAMBOTRA JESOSY

33

Ary Jodasy Iskariota, ilay isan'ny roa ambin'ny folo lahy, dia nankao amin'ny lohan'ny mpisorona hamadika an'i Jesosy aminy. Ary rehefa nandre izany izy ireo, dia faly ka nanaiky hanome vola azy. -Marka 14:10-11a

Ary Jesosy mbamin'ny mpianany dia tonga tao amin'ny saha anankiray atao hoe: Getsemane, ary hoy Izy tamin'ny mpianany: "Mipetraha eto aloha hianareo, raha mbola mankeroa hivavaka Aho." Ary nitondra an'i Petera mbamin'izy roa lahy zanak'i Zebedio Izy, dia nalahelo am-po sy ory indrindra. Ary nony nandroso kelikely Izy, dia niankohoka ka nivavaka hoe: "Raiko ô, raha azo atao, dia aoka hesorina amiko ity kapoaka ity; nefa aoka tsy ny sitrapoko anie no hatao, fa ny Anao." -Matio 26:36-37, 39

Ary Jodasy, rehefa nahazo ny miaramila iray toko sy mpiandry raharaha avy tamin'ny lohan'ny mpisorona sy ny Fariseo, dia nankeo nitondra fanilo sy fanala ary fiadiana. Ary ny miaramila iray toko sy ny mpifehy arivo ary ny mpiandry raharaha tamin'ny Jiosy dia nisambotra an'i Jesosy ka namatotra Azy.

-Jaona 18:3, 12

Ary ny lohan'ny mpisorona sy ny Synedriona rehetra nitady vavolombelona hiampanga an'i Jesosy hamonoany Azy, nefa tsy nahita. Fa maro no niampanga lainga Azy, nefa tsy nifanaraka ny fiampangany. -Marka 14:55-56

34 VOAHELOKA SY VOAHOMBO TAMIN'NY HAZO FIJALIANA JESOSY

Ary nony maraina ny andro, ny lohan'ny mpisorona rehetra sy ny loholona dia niaranihevitra hiampanga an'i Jesosy mba hamonony Azy. Ary rehefa nafatony Izy, dia nentiny ka natolony an'i Pilato governora. Hoy Pilato taminy: "Ka ahoana kosa ary no ha-taoko amin'i Jesosy, Izay atao hoe Kristy?" Dia hoy izy rehetra: "Aoka hohomboana amin'ny hazo fijaliana Izy." -Matio 27:1-2, 22

Ary tamin'ny ora fahatelo no nanomboany Azy tamin'ny hazo fijaliana. Ary ny soratra milaza ny nanamelohana Azy dia voasoratra teo amboniny hoe: MPANJAKAN'NY JIOSY. Ary nisy jiolahy roa nohomboany tamin'ny hazo fijaliana koa, ny anankiray teo amin'ny ankavanany, ary ny anankiray teo amin'ny ankaviany. Ary izay nandalo dia niteny ratsy Azy sady nihifikifi-doha ka nanao hoe: "Hià! Ry Ilay maharava ny tempoly sy mahatsangana azy amin'ny hateloana, vonjeo ny tenanao, ka midina hiala amin'ny hazo fijaliana." Ary toy izany koa no faneson'ny lohan'ny mpisorona, fa niresaka izy sy ny mpanora-dalàna nanao hoe: "Namonjy ny sasany Izy, fa ny tenany tsy hainy vonjena." -Marka 15:25-31

Ary niantso tamin'ny feo mahery Jesosy ka nanao hoe: "Raiko ô, eo an-tànananao no atolotro ny fanahiko," ary rehefa niteny izany Izy, dia afaka ny ainy. -Lioka 23:46

NOTANTARAIN'NY VAVOLOMBELONA 35 NY NAHAFATESAN'I JESOSY

Ary hatramin'ny ora fahenina ka hatramin'ny ora fahasivy dia maizina ny tany rehetra. Ary rehefa niantso tamin'ny feo mahery indray Jesosy, dia nanolotra ny fanahiny. ...dia nihorohoro ny tany, ka nitresaka ny vatolampy. Ary ny kapiteny sy ny fehiny, izay niambina an'i Jesosy, raha nahita ny horohorontany mbamin'izay zavatra tonga teo, dia raiki-tahotra indrindra ka nanao hoe: "Marina tokoa fa Zanak'Andriamanitra io Lehilahy io." -Matio 27:45, 50-51b, 54

Dia tonga ny miaramila ka nanapaka ny ranjon'ny voalohany sy ny an'ny anankiray koa izay niaraka nohomboana tamin'ny Jesosy tamin'ny hazo fijaliana. Fa nony nankeo amin'i Jesosy izy, dia hitany fa efa maty Izy, ka dia tsy mba notapahiny ny ranjony. Fa ny miaramila anankiray nandefona ny lanivoany, ary niaraka tamin'izay dia nisy ra sy rano nandeha.... Fa tonga izany mba hahatanteraka ny Soratra Masina hoe: "Tsy hisy hotapahina ny taolany." Ary hoy koa ny teny iray ao amin'ny Soratra Masina: "Hijery Izay nolefoniny izy." -Jaona 19:32-37

"Fa hianareo... fa ny Tompon'ny aina kosa no novonoinareo; fa Izy natsangan'Andriamanitra tamin'ny maty, ary vavolombelon'izany izahay." -Asan'ny Apostoly 3:14-15

**36 NALEVINA JESOSY NEFA
NITSANGANA TAMI'NY MATY
TAMIN'NY ANDRO FAHATELO**

Dia nivory nankeo amin'i Pilato ny lohan'ny mpisorona sy ny Fariseo ka nanao hoe: "Tompoko, tsaroanay fa iny mpamitaka iny, fony Izy mbola velona, dia nanao hoe: 'Raha afaka hateloana, dia hitsangana Aho.' Koa asaovy hambenana mafy ny fasana mandrapahatongan'ny andro fahatelo, fandrao avy ny mpianany ka mangalatra Azy, dia hilaza amin'ny olona hoe: 'Efa natsangana tamin'ny maty Izy.' ..." Hoy Pilato taminy: "Makà mpiambina ka mandehana, ary ataovy mafy araka izay hainareo ny fiambenana." Ary nony lasa izy, dia nalatsany ny mpiambina hiambina mafy ny fasana, rehefa nasiany toambo-kase ny vato.

-Matio 27:62b-66

Raha vao nazava ratsy ny andro voalohany amin'ny herinandro, dia avy hizaha ny fasana Maria Magdalena sy ilay Maria anankiray. Ary, indro, nisy horohorontany mafy; fa nisy anjelin'ny Tompo nidina avy tany an-danitra, dia nankeo ka nanakodia ny vato, dia nipetraka teo amboniny. Ary ny fijery azy dia tahaka ny helatra, ary ny fitafiany fotsy tahaka ny oram-panala; ary ny mpiambina nivadi-po noho ny fahatahorana azy ka tonga tahaka ny maty. Ary ny anjely namaly ka nilaza tamin'ny vehivavy hoe: "Aza matahotra hianareo; fa fantatro fa Jesosy, Izay efa nohomboana tamin'ny hazo fijaliana, no tadiavinareo. Tsy ato Izy, fa efa nitsangana araka izay nolazainy."

-Matio 28:1b-6a

MANDRESY NY FAHAFATESANA 37

JESOSY

[Kristy] dia nalevina, ary natsangana tamin'ny andro fahatelo araka ny Soratra Masina.

–1 Korintiana 15:4

“Satria Izaho manolotra ny aiko mba handraisako azy indray. Tsy misy manaisotra ny aiko amiko, fa ny tenako ihany no manolotra azy. Manana fahefana hanolotra azy Aho, ary manana fahefana haka azy indray....”

–Jaona 10:17b-18

Hofonany tsy hisy mandrakizay ny fahafatesana; Ary Jehovah Tompo hamafa ny ranomaso amin'ny tava rehetra. –Isaia 25:8a

“Dia Ilay velona; efa maty Aho, nefa, indro, velona mandrakizay mandrakizay sady manana ny fanalahidin'ny fahafatesana (hèlo) sy ny fiainan-tsi-hita.”

–Apokalypsy 1:18

“Ry fahafatesana ô, aiza ny fandresenao?” Fa isaorana anie Andriamanitra, Izay manome antsika ny fandresena amin'ny alalan'i Jesosy Kristy Tompontsika. –1 Korintiana 15:55a, 57

“Aza gaga amin'izany; fa avy ny andro izay handrenesan'ny olona rehetra any am-pasana ny feony; dia hivoaka izy: izay nanao tsara dia ho any amin'ny fitsanganana ho fiainana; fa izay nanao ratsy kosa dia ho any amin'ny fitsanganana ho fahamelohana.” –Jaona 5:28-29

38 MISEHO JESOSY TAORIAN'NY NITSANGANANY TAMIN'NY MATY

Ary rehefa nitsangana tamin'ny marain'ny andro voalohany amin'ny herinandro Jesosy, dia niseho voalohany tamin'i Maria Magdalena, ilay namoahany demonia fito, Izy. Ary taorian'izany Jesosy dia niseho tamin'ny endrika hafa tamin'ny roa lahy aminy, izay nankany an-tsaha. —Marka 16:9, 12

Ary rehefa harivan'ilay andro voalohany amin'ny herinandro, raha voarindrina ny varavaran'izay niangonan'ny mpianatra, noho ny fahatahorany ny Jiosy, dia tonga Jesosy ka nitsangana teo afovoany, dia nanao taminy hoe: “Fiadanana ho anareo.” Ary rehefa nilaza izany Izy, dia nasehony azy ny tàmàny sy ny lanivoany. Dia faly ny mpianatra, raha nahita ny Tompo. —Jaona 20:19-20

Ary niseho tamin'i Kefasy Izy, dia vao tamin'ny roa ambin'ny folo lahy koa. Rehefa afaka izany, dia niseho tamin'ny rahalahy tsy omby diman-jato Izy,.... Rehefa afaka izany, dia niseho tamin'i Jakoba izy, dia tamin'ny Apostoly rehetra. —1 Korintiana 15:5, 6a, 7

“Nefa natsangan'Andriamanitra kosa Izy tamin'ny andro fahatelo ka nasehony marimarina, tsy tamin'ny olona rehetra, fa tamin'ny va-volombelona izay notendren'Andriamanitra rahateo, dia taminay izay niara-nihinana sy nisotro taminy, rehefa nitsangana tamin'ny maty Izy.” —Asan'ny Apostoly 10:40-41

MANIRAKA NY MPIANANY JESOSY 39 DIA MIAKATRA HO ANY AN-DANITRA

Ary hoy indray Jesosy taminy: “Fiadanana ho anareo; tahaka ny nanirahan’ny Ray Ahy no anirahako anareo kosa.” ...ka hoy Izy taminy; “Raiso ny Fanahy Masina.” –Jaona 20:21-22

“Efa nomena Ahy ny fahefana rehetra any an-danitra sy etỳ an-tany; koa mandehana hianareo, dia ataovy mpianatra ny firenena rehetra, manao batisa azy ho amin’ny anaran’ny Ray sy ny Zanaka ary ny Fanahy Masina sady mampianatra azy hitandrina izay rehetra nandidiko anareo; ary, indro, Izaho momba anareo mandrakariva ambara-pahatongan’ny fahataperan’izao tontolo izao.” –Matio 28:18b-20

“Fa hahazo hery hianareo amin’ny hilatsahan’ny Fanahy Masina aminareo, ary ho vavolombeloko any Jerosalema sy eran’i Jodia sy Samaria ary hatramin’ny faran’ny tany.” Ary rehefa nilaza izany Jesosy, dia nakarina Izy, raha mbola nijery izy ireo; ary nisy rahona nitondra Azy, ka tsy hitan’ny masony intsony Izy. Ary raha mbola nandinika ny lanitra izy ireo tamin’ny nandehanan’i Jesosy, indreo, nisy roa lahy teo anilany niakanjo akanjo fotsy.

–Asan’ny Apostoly 1:8-10

Ary Jesosy Tompo, rehefa niteny taminy, dia nampiakarina ho any an-danitra ka nipetraka eo ankavanan’Andriamanitra. Fa izy ireo kosa dia lasa ka nitori-teny eny tontolo eny, ary ny Tompo niara-niasa taminy....

–Marka 16:19-20a

40 TONGA ARAKA NY NAMPANANTE- NAIN'I JESOSY NY FANAHY MASINA

“Ary Izaho hangataka amin’ny Ray, ary Izy hanome anareo Mpananatra hafa mba ho eo aminareo mandrakizay, dia ny Fanahin’ny fahamarinana, Izay tsy azon’izao tontolo izao horaisina, satria tsy hitany na fantany; fa hianareo no mahafantatra Azy, satria mitoe-tra eo aminareo Izy, ary ho ao anatinareo. Tsy hamela anareo ho kamboty Aho; hankatỳ aminareo Aho.”

–Jaona 14:16-18

Ary nony tonga ny Andro Pentekosta, dia teo amin’ny fitoerana iray izy rehetra. Ary nisy feo tonga tampoka avy tany an-danitra, toy ny rivotra mahery mifofofoko, ka nanenika ilay trano niangonany. Ary nisy lela maro mitarehin’afoniseho taminy, izay nizarazara; ary nipetraka tamin’izy rehetra isan-olona izany. Ary samy feno ny Fanahy Masina izy rehetra, ka dia niteny tamin’ny fiteny maro samy hafa, araka ny nampitenenan’ny Fanahy Masina azy.

–Asan’ny Apostoly 2:1-4

“Izany Jesosy izany dia efa natsangan’Andriamanitra, ary vavolombelon’izany izahay rehetra. Ary rehefa nasandratry ny tàmàna ankavanan’Andriamanitra Izy, ary nandray tamin’ny Ray ny Fanahy Masina Izay noka-sainy, dia efa nampilatsaka izao hitanareo sy renareo izao Izy.”

–Asan’ny Apostoly 2:32-33

VELONA AO AMIN'ZAY MINO AZY 41 JESOSY AMIN'IZAO FOTOANA IZAO

“Tomoera amiko ary Izaho aminareo. Tahaka ny sampany tsy mahay mamoa ho azy, raha tsy miray amin'ny voaloboka izy, dia toy izany koa hianareo, raha tsy miray amiko. Izaho no voaloboka, hianareo no sampany. Izay miray amiko, ary Izaho aminy, dia mamoa be izy; fa raha misaraka amiko kosa hianareo, dia tsy mahay manao na inona na inona.”
–Jaona 15:4-5

Ary izay mitandrana ny didiny no mitoetra ao aminy, ary Izy kosa ao aminy. Ary izao no ahafantarantsika fa mitoetra ao amintsika Izy, dia ny Fanahy Izay nomeny antsika.
–1 Jaona 3:24

Voahombo miaraka amin'i Kristy amin'ny hazo fijaliana aho, ary tsy izaho intsony no velona, fa Kristy no velona ato anatiko; fa izay ivelomako ankehitriny eo amin'ny nofo dia ivelomako amin'ny finoana ny Zanak'Andriamanitra, Izay efa tia ahy ka nanolotra ny tenany hamonjy ahy.
–Galatiana 2:20

Mba homeny anareo... ny mba hohatanjahi-na fatratra amin'ny Fanahiny ny toe-panahinareo; mba hitoeran'i Kristy ao am-ponareo amin'ny finoana.
–Efesiana 3:16-17a

Ary izay ao amin'ny nofo dia tsy mahay manao ny sitrapon'Andriamanitra. Fa hianareo tsy ao amin'ny nofo, fa ao amin'ny Fanahy, raha ny Fanahin'Andriamanitra no mitoetra ao atatinareo. Fa raha misy kosa tsy manana ny Fanahin'i Kristy dia tsy Azy izy. –Romana 8:8-9

42 OMEM-BONINAHITRA JESOSY

Fa Ilay natao ambany kely noho ny anjely no hitantsika, dia Jesosy, ary noho ny fitondrany ny fahafatesana dia voasatroka voninahitra.

—Hebreo 2:9a

Fa nahazo laza amam-boninahitra tamin'Andriamanitra Ray Izy, raha tonga teo aminy avy tamin'ny voninahitra lehibe indrindra ilay feo nanao hoe: “Ity no Zanako malalako Izay sitrako.” Ary renay io feo avy tany an-danitra io, raha niara-nipetraka taminy tany an-tendrombohitra masina izahay. —2 Petera 1:17-18

Ary teo afovoan'ny fanaovan-jiro dia nisy Anankiray tahaka ny Zanak'olona niakanjo akanjo lava hatrany an-tongony sady nisikina fisikinam-bolamena teo amin'ny tratrany. Ary ny lohany sy ny volony dia fotsy tahaka ny volon'ondry fotsy, dia tahaka ny orampanala, ary ny masonry tahaka ny lelafo; ary ny tongony tahaka ny varahina manganohano, hoatra ilay voadio teo amin'ny fandrendrehana iny; ary ny feony toy ny firohondrohon'ny ranobe. Ary nitana kintana fito teny an-tànany ankavanana Izy; ary nisy sabatra maranitra roa lela nivoaka avy teo am-bavany; ary ny tarehiny dia tahaka ny masoandro mamirapiratra amin'ny heriny. Ary raha nahita Azy aho, dia lavo niankohoka tahaka ny maty teo anoloan'ny tongony. Fa Izy nanendry ahy tamin'ny tànany ankavanana ka nanao hoe: “Aza matahotra; Izaho no Voalohany sy Farany.”

—Apokalypsy 1:13-17

MANDEFA HAFATRA HO AN'NY 43

FIANGONANA JESOSY

“Kanefa manan-teny aminao Aho, satria efa niala tamin’ny filtiavanao voalohany hianao. Koa tsarovy izay nitoeranao fony tsy mbola lavo, dia mibebaha, ka manaova ny asa voalohany....”
-Apokalypsy 2:4-5a

“Aza matahotra izay efa hiaretanao.... Aoka ho mahatoky hatramin’ny fahafatesana hianao, dia homeko anao ny satro-boninahitra fiainana.”
-Apokalypsy 2:10

“Izay maharesy dia hitafy lamba fotsy tahaka ireo koa, ary tsy hamono ny anarany eo amin’ny bokin’ny fiainana tokoa Aho, fa hanaiky ny anarany eo anatrehan’ny Raiko.”
-Apokalypsy 3:5a

Fa manana hery kely ihany hianao ka nitandrina ny teniko ary tsy mba nandà ny anarako.
-Apokalypsy 3:8b

“Fa satria matimaty hianao ka tsy mafana na mangatsiaka, dia efa haloan’ny vavako hianao.”
-Apokalypsy 3:16

“Izay rehetra tiako no anariko sy faizako. Izay maharesy dia havelako hiara-mipetraka amiko eo ambonin’ny seza fiandrianako, dia tahaka ny nandreseko kosa sy ny niarahako nipetraka amin’ny Raiko eo ambonin’ny seza fiandrianany.”
-Apokalypsy 3:19a, 21

44 INONA NO ATAON'I JESOSY AMIN'IZAO FOTOANA IZAO

Fa Izy kosa, rehefa nanao fanatitra iray monja ho mandrakizay noho ny ota, dia efa mipetraka eo an-tànana ankavanan'Andriamanitra. —Hebreo 10:12

Koa satria isika manana Mpisoronabe lehibe, Izay lasa namaky ny lanitra, dia Jesosy, Zanak'Andriamanitra, aoka isika hihazona ilay efa nekentsika. Fa isika tsy manana mpi-soronabe izay tsy mahay miara-mitondra ny fahalementsika, fa Izay efa nalaim-panahy taminy zavatra rehetra tahaka antsika, kanefa tsy nanana ota. Koa aoka isika hanatona ny seza fiandrianan'ny fahasoavana amin'ny fahasahiana, mba hahazoantsika famindrampo sy hahitantsika fahasoavana ho famonjena amin'izay andro mahory. —Hebreo 4:14-16

Fa Izy kosa dia manana fisoronana tsy dimbasana, satria maharitra mandrakizay Izy; koa amin'izany dia mahavonjy tokoa izay manatona an'Andriamanitra amin'ny alalany Izy, satria velona mandrakizay hanao fifonana ho azy. —Hebreo 7:24-25

Fa hoy Izy: “Izaho tsy handao anao mihitsy na hahafoy anao akory.” Ka dia sahy manao hoe isika: “Jehovah no Mpamonjy ahy, ka tsy hatahotra aho; Inona no azon'ny olona atao amiko?” Jesosy Kristy no tsy miova omaly sy anio ary mandrakizay. —Hebreo 13:5b, 6, 8

**MANOME TOKY JESOSY
FA HIVERINA INDRAY**

45

“Dia ho avy indray ka handray anareo ho any amiko, ka izay itoerako no hitoeranareo koa.”
–Jaona 14:3b

Fa ny tenan’ny Tompo no hidina avy any andanitra amin’ny fiantsoana ... ka izay maty ao amin’i Kristy no hitsangana aloha; ary rehefa afaka izany, dia isika izay velona ka mbola mitoetra no hakarina hiaraka aminy ho eny amin’ny rahona hitsena ny Tompo any amin’ny habakabaka; dia ho any amin’ny Tompo mandrakariva isika.
–1 Tesaloniana 4:16-17

“Fa tahaka ny helatra avy any atsinanana ka hita hatrany andrefana, dia ho tahaka izany ny fihavian’ny Zanak’olona. Ary amin’izany andro izany dia hiseho eo amin’ny lanitra ny famantarana ny Zanak’olona, ka dia hitomany ny firenena rehetra ambonin’ny tany, ary hahita ny Zanak’olona avy amin’kery sy voninahitra lehibe eo amin’ny rahon’ny lanitra izy. Ary amin’ny ampanenoana mafy ny trompetra dia haniraka ny anjeliny Izy, ary hangonin’ireo ny olom-boafidy avy amin’ny vazan-tany efatra hatramin’ny faravodilanitranitra rehetra.”
–Matio 24:27, 30-31

“Fa ho avy ny Zanak’olona amin’ny voninahitry ny Rainy, mbamin’ny anjeliny, dia hamaly ny olona rehetra araka ny nataony.”

–Matio 16:27

HITSARA IZAO TONTOLO IZAO JESOSY

“Ary Andriamanitra...fa ankehitriny Izy mandidy ny olona rehetra amin’izao tontolo izao hibebaka, satria Izy efa nanendry andro iray, izay hitsarany izao tontolo izao amin’ny fahamarinana amin’ny alalan’ny Lehilahy iray votendriny, koa efa nanome vavolombelona hampino ny olona rehetra izany Izy tamin’ny nananganany Azy tamin’ny maty.”

-Asan’ny Apostoly 17:30-31

“Maro no hanao amiko amin’izany andro izany hoe: ‘Tompoko, Tompoko, tsy efa naminy tamin’ny anaranao va izahay? ary tsy efa namoaka demonia tamin’ny anaranao va izahay? ary tsy efa nanao asa lehibe tamin’ny anaranao va izahay?’ Ary dia hambarako aminy marimarina hoe: Tsy mba fantatro akory hianareo hatrizay hatrizay; mialà amiko, hianareo mpanao meloka.”

-Matio 7:22-23

Koa samy hampamoahin’Andriamanitra ny amin’ny tenany avy isika rehetra. -Romana 14:12

Fa ho avy tahaka ny mpangalatra ny andron’ny Tompo, ary amin’izany ny lanitra dia ho lasa amin’ny firimorimoana mafy, ary ho levon’ny afo ny tenan’ny zavatra rehetra, ka hodorana avokoa ny tany sy ny asa izay eo aminy. Koa raha ho levona toy izany izao zavatra rehetra izao, dia olona tokony hanao ahoana moa hianareo amin’ny fitondrantena masina sy ny toe-panahy araka an’Andriamanitra, sady manantena ho mampahafaingana ny hihavian’ny andron’Andriamanitra.

-2 Petera 3:10-12a

Koa izany no nanandratan'Andriamanitra Azy indrindra sy nanomezany Azy ny anarana izay ambony noho ny anarana rehetra, mba ho amin'ny anaran'i Jesosy no handohalehan'ny lohalika rehetra, na ny any an-danitra, na ny etỳ an-tany, na ny any ambanin'ny tany, sy haneken'ny lela rehetra fa Jesosy Kristy no Tompo ho voninahitr'Andriamanitra Ray.

–Filipiana 2:9-11

“Ary mbola nahita tamin'ny fahitana tamin'ny alina ihany aho, ary, indro, nisy toy ny zanak'olona avy tamin'ny rahon'ny lanitra.... Ary nomena fanapahana sy voninahitra ary fanjakana Izy, mba hanompoan'ny fokompirenena sy ny firenena ary ny samy hafa fiteiny rehetra Azy; ny fanapahany dia fanapahana mandrakizay ka tsy ho tapaka, ary ny fanjakany tsy ho rava.”

–Daniela 7:13-14

“Ny Zanak'ondry, Izay novonoina, Dia mendrika handray hery sy harena sy fahendrena Sy faherezana sy haja sy voninahitra ary saotra.”

–Apokalypsy 5:12b

Dia nisy feo mafy tany an-danitra nanao hoe: “Ny fanjakana amin'izao tontolo izao dia efa lasan'ny Tompontsika sy ny Kristiny; ary Izy no hanjaka mandrakizay mandrakizay.”

–Apokalypsy 11:15b

TIAN'I JESOSY HIARAKA AMINY HIANAO

“Mankanesa atỳ amiko, hianareo rehetra izay miasa fatratra sy mavesatra entana, fa Izaho no hanome anareo ny fitsaharana. Ento ny ziogako, ka mianara amiko; fa malemy fanahy sady tsy miavona am-po Aho; dia hahita fitsaharana ho an’ny fanahinareo hianareo.”

-Matio 11:28-29

“Indro, efa mitsangana eo am-baravarana Aho ka mandòndòna; raha misy mihaino ny feoko ka mamoha ny varavarana, dia hiditra ao aminy Aho ka hiara-misakafo aminy, ary izy amiko.”

-Apokalypsy 3:20

Ny Tompo tsy mahela ny teny fikasany, araka izay ataon’ny sasany ho fahelany; fa mahari-po aminareo Izy, ka tsy tiany hisy ho very, fa mba ho tonga amin’ny fibebahana izy rehetra.

-2 Petera 3:9

“Izay rehetra homen’ny Raiko Ahy no hana-tona Ahy; ary izay manatona Ahy tsy mba ho laviko mihitsy.”

-Jaona 6:37

“Ary na zovy na zovy no hiantso ny anaran’i Jehovah dia hovonjena.” -Asan’ny Apostoly 2:21

Ary tamin’ny andro famonjena no namon-jeko anao.

-2 Korintiana 6:2b

Ary aoka ho avy izay mangetaheta; ary izay mety, aoka izy hisotro maimaimpoana amin’ny ranon’aina.

-Apokalypsy 22:17b

INONA NO HATAONAO MIARAKA AMIN'I JESOSY?

“Izay mino ny Zanaka manana fiainana mandrakizay; fa izay tsy mino ny Zanaka dia tsy hahita fiainana, fa ny fahatezeran'Andriamanitra no mitoetra eo aminy.” –Jaona 3:36

Hataontsika ahoana ny fandositra, raha tsy mitandrina izao famonjena lehibe izao isika?
–Hebreo 2:3a

Fa izay rehetra nandray Azy dia nomeny hery ho tonga zanak'Andriamanitra, dia izay mino ny anarany. –Jaona 1:12

Satria raha manaiky an'i Jesosy ho Tompo amin'ny vavanao hianao ary mino amin'ny fono fa Andriamanitra efa nanangana Azy tam-in'ny maty, dia hovonjena hianao. Fa amin'ny fo no inoana hahazoana fahamarinana, ary amin'ny vava no anekena ahazoana famonjena.
–Romana 10:9-10

VAVAKA

Andriamanitra ô!

Manaiky aho fa mpanota, nefa nomboina teo amin'ny hazo fijaliana Jesosy Kristy Zanakao Lahitokana hitondra ny fahotako rehetra, koa mangataka ny famelaneloka avy Aminao aho izao. Sasao amin'ny ranao ny fahotako Jesosy Kristy, tapakevitra ny hampandroso Anao ato am-poko aho ary hataoko mpanapaka ny fiainako lanao manomboka izao. Mitoera ato anatiko.

Amin'ny anaran'i Jesosy Kristy. Amena!



Published in numerous languages by World Missionary Press, Inc., as God supplies funds in answer to prayer. **For questions or more information by country, visit: www.wmp-contacts.org**



World Missionary Press
PO Box 120
New Paris, IN 46553-0120 USA
www.wmpress.org

11-25

Read booklets online or by App
www.wmp-readonline.org
1616/2 Malagasy ALC